

四庫全書

史部

欽定四庫全書

徐霞客遊記卷三下

明 徐宏祖 撰

西南遊日記四

廣西

六月十二日自蘇橋登洛容舟順流西南五十里過永福縣又八十五里泊新安鋪

十三日一百二十里抵洛容縣陸去柳州府五十里水須三日溯柳江乃至遂定騎為明日陸行計

十四日出城南西二十里為高嶺鋪南寨山秀立其南  
乃南折登嶺共五里直抵南寨山西柳江逼其西崖舟  
人艤舟以渡有小溪自南寨破壑西注柳江曰山門冲  
江東西為洛容馬平界去治各二十五里登西岸瀕江  
南向行為馬鹿堡東望隔江南寨山分枝聳秀亭亭露  
竒又五里西向踰坳入則石峰夾道森立南峰曰羅山  
頂北向有洞斜竄開兩門仰眺無躋扳路西麓又有洞  
駢峙其北峰南面峭削尤異西二里小峰中峽立曰

獨秀峰迴眺羅山西麓洞心異之遂從歧東南披宿草  
一里抵羅山西南角東轉循其南麓北望山半亦有洞  
南向高少遜北巔而面背正相值轉山之東踰坳北入  
一坪中開其右峰北巨石數十丈斜疊起衣折古勁逼  
肖左崖之北雙門墜峽下內洞北向深削成淵底伏流  
澄澈兩旁俱削壁數十丈南進窅然莫窺其源北抵洞  
口壁亦蘄絕上有橫石高二尺如闕可坐瞰其底无能  
踰險下也北出峽門上有道直上西峰得石坊坊後有

洞東向中甚高平寬朗探其左北轉漸黑隘右則西上  
愈昏邃裏後有透明處久之不得出仍從石坊共二里  
轉山西麓先入一洞門西向左轉而西進黑不可捫右  
轉東下窮於水出洞又北即向大道所望洞洞門亦西  
向連疊兩重洞外一大石橫卧當門峻不可踰北有隘  
側身以入為下洞中懸一石復界洞為兩南北列先從  
南門入稍窪下南壁峻裂非扳躋可及北崖有微隙正  
穿入北門內亦下墜東入洞底水聲汨汨與南洞右

轉之底下穴潜通由北門出仰視上層石如荷葉下覆  
虛懸徑絕上躋復從南門側左穿外竅得旁龕龕外有  
峽對峙相距尺半其上南即龕頂盡處北即覆葉端從  
峽中手扳足撐遂挺虛凌其上上層洞東入不深惟洞  
北裂崖成竇環柱通門石質態各各創變扳隙西透崖  
轉南向開二楹下跨重樓陽朔珠明外此為最出洞返  
獨秀峰下西向大道馳五六里北望兩尖峰亭亭夾立  
南則羣峰森繞中有石綴出峰頭纖幻殊甚又西五六

里柳江自南而北即郡城東繞之江也西渡江二里入柳郡郡三面距江故曰壺城江自北來復北折而去南環甚寬北夾束形正與壺等寓郡治西因靜聞病卧予亦數日不出

十八日始出大南門渡江江之南稍西為馬鞍山而兩端並聳為郡案山稍東為屏風山形伏處方正東北為登臺山乃扼江北轉者也馬鞍西尖峰聳削曰立魚山山特起南復有山映之非近出其下不能辨立魚當賓

州大道在城西南隅由山東北麓躡級盤崖上岩門東  
向踞山半門外右上復旁裂一龕若綴閣其左下拾級數  
層又另穴一竅雙峽夾壁高穹直入皆門以外景也入  
岩張巨吻中寬夷整朗後通兩竅一南一北皆穿腹西  
入先由南竅進內忽隆然高盤西復透一門踰闕出西  
臨絕壑遙睇西南羣峰開繞延甚廣由門右穿峽竅以  
下復有洞西向石柱中懸柱後穴即前洞所通北竅也  
門內左循岩壁上洞橫南北勢愈高盤頂有五穴乘空



紛若列星其下東開一穴前達僧樓置鍵不通行稍南  
西轉下峽復西透一門前亦下臨西壑門左轉入內亦  
下墜成峽直迸東底深峻不入下緣其上捫崖透腋又  
南出一門前一小峰枝起與大峰駢立成坳從其間扳  
崖梯石直躡立魚巔是洞透漏山腹東開門二西開門  
三南開門一頂懸頂裂復十餘穴真異境矣仍出前洞  
門右歷級南上少憩僧廬東瞰山下塘匯水一方內沁  
不知所去東所對即馬鞍西北麓為仙奕岩居人祇知

馬鞍不復曉仙奕實元二岩也東南所對乃馬鞍西北  
枝峰峰有壽星岩岩後重岩迴復為馬鞍奧境非一覽  
可盡予欲候靜聞故并仙奕俱留為後游

十九日留僕伴靜聞寓中予獨挈囊為融縣游出西南  
門得沙弓小舟同舟者欲明晨行竟宿沙際

二十日上午始發舟循城西北溯柳江江之西鵝山亭  
亭獨立曠野中自柳郡西北兩岸山土石間出土山迤  
邐間忽石峰數十挺立成隊所異陽朔桂林者彼四顧

石峰不受寸土此則如錐處囊中尤覺有脫穎異北二  
十里泊古陵堡

二十一日過杉嶺江右尖峰突出共五十里抵柳城縣  
城西江道分為二自西來者慶遠江也其源一出天河  
縣為龍江一出貴州都勻司為烏泥江經忻城北入龍  
江合流至此自北來者懷遠江也其源一出貴州平越  
府一出黎平府流經懷遠融縣至此二江合為柳江所  
謂黔江也下經柳郡歷象州與鬱江合於潯今分潯州

南寧太平三府為左江道以鬱江為左也分柳州慶遠  
思恩為右江道以黔江為右也然鬱江上流復自為左  
右二江則以雲南交水南盤江為右交趾廣源州麗江  
為左也二江合於南寧西合江鎮古左右二江指此今  
則以黔鬱分耳南盤自交水下田州至南寧合江鎮合  
麗江是為右江北盤自普安經忻城為都泥江入黔江  
經象州至潯郡合鬱亦為右江是南北二盤在廣右俱  
為右江但合非一地耳雲南志以為二盤分流千里至

合江鎮合則誤以為南寧左右二江俱源自盤江不知南盤元關於麗江北盤且不出合江鎮也下午自柳城北溯懷遠江入又十里抵舊縣

二十二日暑雨時作僅行三十里

二十三日西北十里過草墟江右崖壁峭秀又十里江左山崖迴亘內遙峰森列攢合天半於是舟反東北轉十五里抵沙弓融縣內江也江之西南即為羅城縣東界西望隅江羣峰滙聚處皆羅城道中所由也

二十四日仍附原舟向和睦墟先是沙弓人謂明日乃和睦墟期墟散有融縣歸舟原舟亦往墟市米故仍附之行舟自沙弓西即東轉北一里有江來自西北舞陽江也內灘石甚險又北東九里抵和睦墟墟已散不得舟得一荷鹽歸者附囊與之行北二十里大道直北向縣而荷囊者家東梁西北遂同西北行二里上雞籠嶺西大山曰古東山山北東隅為東梁抵縣大道所經也越雞籠嶺三里抵其家去真仙岩尚十里餘去縣十五

里

二十五日北取真仙道過讀學岩岩有二門俱南向東  
西並列相去數丈外障駢崖中通橫穴若複道行空蜃  
樓內朗垂蓮倒柱鈎連旁映軒奭可憩西有小石峰特  
起田間旁絕延附亦有門東向并越水畦入之初入覺  
峽逼无竒穿門西進罅迸十字西既通明南北俱裂竅  
土人架木竅間若欲為懸閣以居者又西循溪塍里許  
抵赤龍岩岩北向穹然山半洞前北窾兩峰洞當其中

高曠宏邃底平而上窪門內石臺兩重界其間洞右列  
柱分楞別成歇室中洞直入數丈脊稍隆起成仙田中  
每貯水更入漸窪暗聞內門束如竇止容平身入入則  
廓然通別竅恨不攜炬一竟其奧山前有溪自西來分  
兩派東抵東梁北匯安靈潭為靈壽溪之上流云下山  
北越溪北山有洞駢列門南向雖高穹側裂中乃下旋  
如墜螺門外右躋復飛嵌懸崖趣豐凭踞乃下此山正  
與赤龍南北對讀學則東西肩列北趨間道正由此山



讀學兩峽中山東隅復開東向兩岩曰鐘洞曰鐘洞岩  
北岩淺峻若豎鐘剖其半南岩門高層穴屢引上透无  
級入下洞當門巨柱中懸環轉无餘地遂下直北趨二  
里越一脊脊北為百步塘尖峰四列中間平壑一圍循  
山右轉又一里山分突三峰北向列西一峰山半洞門  
西向舍之中峰洞東向東峰洞西向先登東峰洞洞南  
北迸橫峽斜竇有石自山顛下嵌峽底四面可繞而出  
次登中峰其洞北竅下裂上懸南牖石飛架其間上牖

前突石臺憩卧甚適下直北徑百步塘三里越塘北小溪自古鼎來橫涉之又大溪自南趨北即赤龍岩前水東過東梁至此二水合而北行一石梁橫渡東西俱駢峰成峽溪流其中曰靈壽溪北一里匯為安靈潭神龍之所窟也又北里餘山當面橫列洞門開張山半予疑真仙岩至矣至則路轉出其西麓遂東行環其北北復有洞不識中貫南洞否時望真仙岩山尚在北北即安靈溪水流入真仙後洞處予初未晤遂東循山麓出北

轉一里與東梁大道會峰轉溪怒始見真仙前洞東北  
高懸溪流從中北出前有大石梁二道越梁而西南向  
入洞洞門圓迴如半月高穹中刻一山之半其內水陸  
平分北半高崖平敞南半迴流中貫由北畔陸崖入數  
丈中壁橫拓分二道壁之西有竅南入僧棲倚之壁之  
東南溯溪岸深入巨柱中懸上下綴旒紛鬱稍後則老  
君巍然鬚眉皓潔皆玉乳所幻結故又名老君洞其後  
則千門萬戶乳像愈極繽紛以无炬未及入下則溪匯為

淵前趨峽壁激石轟雷其隔溪東崖南與老君對者溪上  
平聳為臺後倚危壁為下層北與僧樓對者層閣高懸  
外復疏明為上層但非鵲橋不能渡遂出憇僧樓同僧  
參慧入市隨之北一里過下廓又北則大江在東即潭  
江北自懷遠大融南來者蔡邕江西自丹江橋遶老人  
岩至此東入江二水合流下廓旁道當其中北渡蔡邕  
橋入融南關約二里城居甚寥落問老人岩道復從下  
廓北循蔡邕江西南行西抵一峰石勢疊聳迴削千仞

老人岩當北溯溪岸予悞南入山峽峽乃老人岩南支  
與南山夾成者南峰北麓石磴盤山而上有僧方汲趨  
問之其上爲獨勝岩非老人岩也穿穴入內開一龕稍  
窪亦隙裂成楞但无光透耳獨勝北有鯉魚岩即古彈  
子岩聞乳柱甚豐不及往仍東北出下廓溯西北小溪  
抵老人岩山下下有洞東向舍之西向拾級上兩崖合  
束懸磴其間取道甚勝已透入一隘轉北上至岩之前  
門其岩一洞兩門前門東南向後門東北向石崖高跨

而東突洞徹其下前後相去不遠亦穿岩類惜前後俱障以佛廬遂令空明頓失從廬側轉入後岩仰見盤空之頂後岩僧樵未返門閉不得入留為後游下山出獨勝東峰披蔓草行二里暮抵真仙岩宿

二十八日參慧東炬導游真仙後暗洞始由天柱老君像後入溪之西崖陸洞也千柱層列衆竇競起前之崇宏雄曠忽為窈窕靈奧窮搜殆盡石下巨蛇橫卧火燭之不見首尾踰之出入竟伏不動然此奧雖幽邃猶溪

西一隅時時由隙東瞰溪流翼得一當終未能下涉既  
出迴顧溪竇內透天光對崖旁通明穴益神動不能已  
托參慧入市覓筏為必入水洞計參慧復執炬引予由岩  
前左石下北入深穴穴雖幽深无乳柱幻空然下多龍  
脊盤錯交伏鱗爪宛然亦一奇也出洞參慧往覓舟予  
恐不能遽得不若躬往索之且以畢老人諸勝乃出洞  
北大道西望山峽間峰巒聳異内有劉公岩草深无藁仍  
從下廓先趨老人岩門東向西北竅深入漸暗聞秉炬

以入徑甚遠從門左仍躋石峽抵上岩轉透後岩內結  
閣盡踞洞口閣前臨眺上下懸崖峭絕蔡邕江西來潞  
其北麓自爲分合抵岩下北轉去大江當其前恍然如  
天表飛仙直北即香山遂下山截流渡江水淺不及膝  
溯江北行望其西江所以來處峰巒瑰異內有雞場洞  
幾隨之西遇荷薪僧指香山在東北乃轉循北山東麓  
一里西登級抵香山廟廟虛無人東北至縣西門又南  
過下廊遇樵者令覓舟入真仙二人慨然許之先是予



屢覓之居人俱云此地无筏而舟為陂阻元由入洞須  
數人負之趨不意此乃漫相許予心不以爲然竊計岩  
中有遺構可結桴浮水獨木不能自移還與參慧圖之  
抵岩參慧已歸亦覓舟不得惟覓人結桴爲便意與予  
適合

二十九日晨促參慧覓結桴者未行昨所期樵者呼羣  
至問已入洞否予應以待舟樵者謂舟不能至若聯木  
為桴予輩水中挾之入正與舟等參慧即以覓人錢畀

之遂羣負木入溪斬竹爲筏頃間桴就復以岩中大梯架其上更置木盆予踞坐盆中諸人前者引縴旁者挾篙後者肩輦遇深淵輒浮水引之遙不能引輒浮水挾之始由洞口溯流仰瞻洞頂益覺穹峻兩崖石壁劈翠夾瓊漸進漸異前望天光遙遙層門複穴交映左右既入重門兩旁俱有層竇盤空上嵌前後光明皎然彼此照耀挾桴者欲從中焚炬登崖以窮旁竅予令先溯流出後洞乃復浮水引桴抵洞門門西南向吸川飲壑溪破

石而下桴爲石格不能入溪捨桴踐石出洞又砉然一天也溪石坎坷不受踵望左崖有懸級在伏莽中援莽蹠空上不數十步輒得溪徑四望平疇中圍衆峰環遶即予昔來橫道北岩之東北隅也返登桴順流入洞中扃東向俱有穴可登而西崖穴高難扳且前游暗洞彷彿近之東崖則穴競門紛曾未一歷遂藝炬東入其上垂乳環柱與老君坐後暗洞諸勝工力悉敵從其內穿隙透折多有旁穴星星上徹雲影知其東透山膚甚薄

從其側宛轉北出已在老君對崖之下層因崖爲臺下  
臨溪流再出即爲對崖之上層上亦列柱縱橫崖壁峻  
阻與此層无徑相達仍引桴下浮欲從溪中再上浮崖  
亦懸嵌无由上躋計取道當從洞前南轉抵東北山椒  
可入洞中非架飛梁不能上也乃絕流引桴還登東崖  
諸人釋桴歸去予亟呼其中一點者攜餘炬導游劉公  
洞北半里西向轉入小歧向山峽二里抵山下一洞在  
南山東向一洞北向北山中突峰又一洞東向方莫知

適從忽聞牧者謦欬聲遙詢之北向高竄者是披莽從  
之其人見予所攜炬一束笑謂入此洞須炬數枚乃可  
竟僅此將何從伏莽中石磴隱隱隨之躋洞門巨石前  
橫從石隙入崖上大鐫西峰之岩四字爲寶祐三年李  
柱高書前又有碑記二方其一不可讀其一爲紹定元  
年太守劉繼祖重開此岩桂林司理參軍饒記并書始  
知名洞以此入洞先藝炬從其後右畔入乳柱環轉不  
數丈出又從其後左畔入數丈後愈轉愈廓玉笋左右

森羅升降曲折杳不可窮紀恐火炬易盡竭蹶嘗巒出  
不知蔗境更何如也西望北山中穴洞石態秀出門若  
雙列中必相通趨其下崖懸无路導者已去見予徘徊  
留眺復至引入南麓小洞內淺不通上岩上岩危嵌峰  
半遙望多姿近之了无警目且徑絕无援不得不却步  
及東行回顧紛綸之致復標異撩人仍強導者艾翳級  
石猿引以登予接之遂歷其上削壁層懸雖兩崖並列  
中不共貫外復淺竭興索而返東南抵真仙岩雨阻岩

中數日

七月初三日予出洞往覓對崖明竅徑東越洞前石梁  
循山南轉而西徑伏草中時不能見抵後山過脊竟不  
得西向登崖徑乃莽然躋山半覓之皆石崖嗟哦无竅  
可入度其處似過而南懸崖復下忽二農過其前詢之  
果尚在北也依所指西北上莽棘中果有一竅止容一  
身而下墜甚深俯瞰之深餘三丈即北崖僧樓對望處  
已聞搨碑僧笑語聲但崖峻下懸不能投虛墜眺視久

之見左壁有豎隙雖直上无容足扳指處隙兩旁相去  
僅一尺五寸可臂綳足撐下乃左轉向隙轉處石皆下  
垂无上歧圓滑不受扳踐摩腹過既至隙中兩臂兩足  
若膠釘稍動即且溜脫下然即欲不動支撐久力竭勢  
必自溜不若乘其勢蹲股就之迨溜將及地輒猛力一  
撐遂免顛頓此法亦勢窮所生非學問可及也既下岩  
寬四丈中平下臨深溪前列層柱若護欄岩內四周環  
壁皆紛紜巖巖非雕琢可殫前與西崖掩映後復得洞



頂雙明竅從中連顧溪出入處俱一望皎然收一洞全勝真仙爲天下第一此又真仙第一也岩右一石平突溪上由其側扳崖而北又連闢兩龕內俱明潔石壁危嵌色態交異如初墜處其前崖亦有一柱傍溪起中纖圓類指上抵洞頂復結幢絡蛟龍繞纖指下垂環而夭矯者數縷內近龕處復有石圓起三尺拍之聲若鐘其旁倒懸之石皆能傳響此皆溪東上層之崖也南與下層並峙崖相隔无幾中有石壁下挿溪根无能外渡稍

內有隙南入皆倒垂龍形縱橫交折異其中通南崖尚有片石隔若鑿空取道於此從下層臺畔結浮橋渡老君坐後宛轉中通无假道於外免投空險真躋勝快事也時雖溜下計上躋无援陽溪呼僧棲中搨碑者乞其授索垂崖庶可挽之上搨者不識外轉道欲以長梯涉溪溪既難越梯長不及崖之半即越溪亦不能下徬徨久之擬候參慧歸覓道授索因午過猶未飯反覆環眺其下豎隙雖无可扳其側覆崖反有凹孔但上瞰不得

見下可因躋聳身從之如鳥斯翼不覺透井出仍從莽中下山返飯真仙岩而卧

初四日聞西南十里古鼎山有懸岩高懸鐵旗新聞且可從真仙後溯靈後上流幾欲命屐為候搨所羈

初六日搨事竣始探鐵旗岩晨食即行過來時橫列之北洞及南洞南過安靈潭西渡溪從歧西向山坳半里踰坳路漸大透山峽出共一里南越小橋即來時橫涉小溪上源也橋南山半洞北向无奇循麓西至古鼎村

問鐵旗岩居人指西北峰半半里抵峰之東南又西始見洞懸山半閣倚於前稍上得層級大木橫偃級旁上叢木耳芝結其下予時急入岩不及細檢抵岩岩南向正與百步塘南山相對內亦无奇外勝頗饒鐵旗名以峰著非以洞著也因問僧龍岩所在僧初住山誤以沸水岩爲龍岩指予西南入龍岩實在東南古鼎村後山予不知從僧半里至沸水岩下穴東北向滿瀦水內聲礮峒東穴亦如之蓋其下皆中空故也予所聞龍岩在

山半乃望高上躋上岐兩峰中削千仞東西各有淺穴側罅終无危厓注水乃下東至古鼎村村後山南向開洞一高峽上穹一圓竅並峙即從岐東上皆无峽中之水如所云龍岩者既下仍由村北舊路過小橋溪挾雨暴漲橋沒水底二尺杖傘以渡念小溪如此若靈壽石堰漲高勢湧必難東渡遇土人取笋歸古鼎問之曰大溪誠難涉可踰嶺抵溪即隨溪北下止涉一小溪竟繞出老君洞左矣予聞之喜甚踰坳抵安靈西堰果水勢

洶湧非揭厲所能及即隨溪左北行約里半近陽溪橫  
列之南洞溪遂西轉又環西面一獨峯從其西麓北轉東  
向趨老君後洞靈壽大溪已東去惟西山夾中有小溪  
西來注之上有堰可涉循溪而東從左越坳下坳皆懸  
石層嵌藤刺冒之不覺陷身沈頂手足失勢傾蕩洪濤  
中汨汨終无出理久之竟出坳脊俯扳棘滾崖出洞左  
疏畦得達洞參慧已下捷支扉矣呼啓扉者再得入洞  
若更生焉

初七日別參慧入城訊舟

初九日始得小舟過午舟發東南行已轉西南共六十里泊沙弓

初十日四十里爲羅岩村岩在江右層脊斑駁五色粲列南崖稍低石芝偃峰頂崖半匏窠一洞當有勝可尋惜來時以暑雨掩篷今去僅隔江遥睇耳又四十里柳城縣縣南二里江之東爲巒攔山削崖截江爲縣城南障西即峭峰叢立土人指爲筆架穿山者棹月順流瞬

息二十里一山兀聳江東岸排列而南江亦隨之南折  
灘聲轟轟如殷雷爲倒催灘又南四十里抵柳州府泊  
南門城鼓猶初下也

十一日早入寓靜聞未瘥顧僕亦病往返二十日冀其  
霍然同行加以顧僕尪弱尤甚爲之悵悵

十三日出城南渡江循馬鞍山北麓西行折而南循其  
西麓由西南塢中登山草沒石級濕滑不能投足仙奕  
岩在山半削崖下門西向正與立魚對祇隔山下平壑



中一潭岩內逼如合掌深止丈餘岩右有石端聳上迸裂成紋參差不齊雖可登憩以爲黑肌赤脈分十八道可奕似未確岩左東南上又裂一岩形與仙奕等西南向其下東南抵坳中又迸一岩亦淺隘不足觀仙奕三岩齊列山半俱相伯仲而已西下山麓還望復得一岩亦西向正在中岩下岩前砥石如枰其北石窟成峽北透通明中開朗可憩出岩西盤一山嘴轉出東南山半有洞西南向登之洞門呀然中高穹上出下深墜縱橫

成峽樓殿層疊雖不甚寬放固以危峻逼裂見竒入門  
有石突門右青踞若牛背復高突一石圓若老人首先  
是立魚僧指其處有壽星岩必即此由突石左懸級下  
墜西出突石之下則下墮淵削上級虛懸皆峭裂不通  
行東入峽道中灣環以進忽天光上映仰睇若重樓空  
架兩崖上覆下嵌无由度虛上躋遙見光映處內門規  
列高懸夾崖末外戶分透前山頂平若覆帷恨不牽綆  
一登下山東仰北山半復有門南向計其處當即前洞

光映所通也下俱迴崖層亘稍東循崖西北上踰下崖抵中崖上崖卒懸絕不得上復從前道下更東循崖角西北登上崖沿崖西陟則洞前三面皆危壁倚空惟此一線盤崖可達前有平石如露臺內旋室方丈四壁俱環柱駢枝分布密嵌西北內通一門下臨深峽果即前仰睇透空處也仍循崖端東南下南復有山鵲起從西麓仰眺山半懸崖穹拓黃斑赭影欲登无路循山南行得微徑從草中東上抵一門外雖穹然內僅如合掌无

可深入望黃赭削立處已在其北崖嘴間隔不可盤陟  
復下至山麓再從莽中望崖登久之抵崖下崖危削數  
千尺上覆下嵌若垂空之雲亘接天半每當平削處裂  
孔一方中多紛綸奇詭第瑣隘不能深入循崖北行上  
有飛突之崖升降石罅中如度凌虛檻榭披覽久之下  
山東出前峽踰畛峽石垣又東兩崖石皆巉嵌叢翠倚  
之共一里出馬鞍東麓得北來道截大道東一里爲郡  
東門對江渡於是瀕江南岸倚屏風山北麓東行里許

抵登臺山江爲山扼轉北去路從山南繞東麓而北一  
里有山橫列三峰其陰即王氏山房所倚予昔來自洛  
容從其北麓渡江者也山南有洞駢立南向岿然其山  
倒石虛懸內裂三峽外通三門宛轉迴合惜不甚深擴  
西峰之陽復有一岩南向皆赭赤之石中甚淺遂下西  
坡小徑北循西麓踰一岡竹塢蒼叢共一里餘東倚山  
麓西臨江坡坡上密箐蔽空連麓交映道出其下行空  
翠中一里抵姚埠東門渡由村後南向登山入竹塢中

簷簷萬箇俱碧玉森翔烟籠日透光影鮮淨清風來披  
洒滌煩慮已而上山石磴甚峻西南折穿榕樹根中又  
東上過一皮石片下石去地五六尺崖旁平度出薄齊  
架板上爲王氏山房小樓三楹橫洞前北臨絕壑勝贍  
遐眺樓後即洞洞高不受樓拚曰東林洞洞後分東西  
竅南入西竅稍東轉黑隘不堪進東竅亦從南入轉東  
忽明踰東闕出巨石迸裂成兩罅北透者石叢而平臺  
中懸其東下隙則茅閣虛嵌削崖四旁聳石成雲非若

他山透腹出一覽竭致也從洞東南躋嶺頂石磴危峻  
収望愈擴直南盡登臺久之下山渡舟適至由東門二  
里返寓

十七日同靜聞及僕下潯州船以中元節無旅客故留  
滯數日

十八日晨食後放舟十里有小山在江左江稍東北曲  
小山東爲龍船山又西道爲夾道雙山乃北門陸路所  
出也又五里爲油閘江始東轉十五里乃轉而南南十

里爲山門冲即向日洛容來渡江處江東爲南寨山西  
麓石崖迴返下嵌江流又南十里爲羅峒前有山兀突  
坪中罅裂其南上連下透如石門其巔一圓石突綴作  
一僧倚崖南向肩與崖齊頭顱上出又五里諸峰森叢  
江右由山門冲至此江稍西南轉又東五里轉而南一  
迴渚成涯曰犁冲山脉北自牛角尖下江流環其東南  
西三面中成盤涯宛似犁尖云忽北轉五里直抵牛角  
山下復轉東去灘聲如轟雷久之乃止懸流迴瀉一瀉



數里曰橫旋灘自犁冲北轉至此若破壁出東南下灘  
五里山漸開又東北二十五里至山江口洛青江自東  
北來注日已西遂泊

十九日乘月放舟五鼓抵賓江有岩特立江左下削上  
突江因之西轉二十里至象州城在江東岸隔江即爲  
象山西二十里過大容堡遂西南行兩岸始廓然無山  
又東南十五里都泥江自西南來會江東北岸一小山  
北面分聳西岐爲哭兀東峰峭削尤甚正對都泥江入

江口特建標以識都泥江者北盤之水發源楊林海子抵普安州由泗城下遷江歷賓州來賓出於此溯流舟至遷江止上流即土司蠻洞人不敢入水多懸流穿穴故鮮核其源流也又按慶遠忻城有烏泥江由縣北合龍江詢之土人咸謂忻城絕無北合龍江水口蓋即都泥南下遷江者且遷江忻城南北接壤烏泥都江音聲相亂實無二水也又東南二十五里東下大灘曰菱角灘又二十里泊瀧村

二十日放舟五里下大鷺灘江右石峰復駢列出又南五里至武宣縣隔江西岸山卓立歧分引墜南下岩皆奇詭若垂首引項偃僂比肩各極怪異志謂縣西有仙人山南有仙岩山當即所望謂諸異峰也東南十里兩岸復曠然又二十五里爲勒馬堡過此即潯郡桂平界南十里兩岸山漸合又五里爲橫石磯石自江右山麓橫突江中返流倒湧遂極瀕洞勢兩岸連山逼束至此爲入峽始又東南二十五里爲鎮峽堡又十里兩岸山

勢益高聳獨冠諸峰間出石峰懸峙江至是轉而東其  
南迴東轉處江左瞰流之石有大書鐫石傳為韓督憲  
留題云東北二十里小溪自北破壁出其內峻崖屈曲  
如夾堵牆又東即大藤度峽處南北兩岸俱有石竄立  
江心昔有巨藤橫架江上故南北兩山徭賊此追彼竄  
藉為津衢韓公雍破賊斷之因名斷藤峽過斷藤五里  
下弩灘遂南出峽口一水自東來注曰小江口合而西  
南下勢甚峻急蓋北自橫石磯入峽南出弩灘其中山

勢迴逼正如道州瀧江嚴州七里瀧但此峽相去六十  
里始入爲東西峽中轉爲南北絕无居廬叢木虧蔽兩  
旁悉猺童窟宅故得因勢展暴使刊木開道則亦丹崖  
釣臺勝概相麗矣西南循山下十五里抵潯州府日已  
暮泊北門

二十二日留靜聞顧僕寓潯之南門覓担夫爲白石勾  
漏都嶠三山游從驛前南渡鬱江八里至車路江小水  
自東南西北入鬱郡舟上水可抵此又南三里爲石橋

村南望白石山與獨秀山各挺峙三十里外山道迂複  
實尚六十里而遙村南二里得迴石一壑清流中瀦石  
皆玲瓏迸裂爲蕪原生采更南匯潭益盛東有山自南  
抵北從其西漸升而南益迸穴平地下陷爲峽爲井中  
悉叢石嵌淵水澄其下蓋地中二丈下皆伏流潛通石  
骨阻亘偶骨裂土迸則石出陷成穴云又南二十七里  
抵姚村依山匯水真山中樂野也渡小溪南踰嶺五里  
爲木角村村在白石山北麓去山尚十里吹宿山村春

舍間

二十三日東南越嶺歧徑望白石趨其山峰攢崖絕東  
北突聳一峰爲獨秀孤懸峭削上齊白石頂若傍若離  
直剖其根崖石獨多赭赤色五里路漸沒草間嶺半得  
一山家傍舍植芭蕉甚盛趨問白石道尚在西南由其  
左登山東向上南轉山脊五里度坳稍東即南折直抵  
山北麓獨秀已不可見惟危崖盤削下多平突之石盤  
亘疊出又作一態直上抵崖石下南出共二里爲三清

岩岩西向橫空大穴濶十餘丈高二丈深及濶之半石  
特平慘即白石下洞也又南半里爲大寺後倚崖壁寺  
左水自半崖下滴曰圓珠池池無異按志山北有漱玉  
泉西事洎百粵風土記俱謂其泉暮聞寺中鐘鼓輒沸  
溢起止則寂然詫爲異及抵白石寺并漱玉名不知何  
況聞鐘泉沸非寺僧之蠢即著書附會之談也遂由池  
前南循崖壁行已東上入石峽峽兩峰中剖上摩層霄  
裂罅相距不及丈磴懸其中時有巨石當關輒置梯以



度連躋六梯始踰峽登坳坳南北猶重崖摩夾稍北轉  
循坳左行則虬木叢篁迷雲暗鳥身度霄漢上不知午  
日之中東嶂稍開始見獨秀東北立東南塢中又起一  
峰正與對峙高殺三之一宛然蓮蕊中擎但四面爲諸  
峰所掩惟此得睹全體耳又北扳懸崖上木根絡石間  
爲梯爲絙得受足緣躡已轉一壑磴自山頂西向墜峽  
系掘潭穴峽南復懸梯上登宛轉三梯東行平岡間外  
則萬仞下削內即絕頂激根之峽內外皆長松一道深

碧間日影下墮臨風颺曳閃映萬端林盡鑿石成磴躋  
磴轉會仙岩岿然南向矣岩皆黃赤石上下開穿內漸湊  
合平慘無紛紜滴瀝與三清同而地位高迥已窮極幽  
暢乃從岩右躡削崖凌絕頂崖雖危削盤阻處中有子  
石鵝卵大嵌突齒齒上露其半藉爲麗趾級不覺一里  
已湧出峰頭東向與獨秀對揖此峰正從潯郡來所望  
獨秀西白石絕頂獨秀四削如天柱非傳翰不能翔上  
此峰三面亦危崖特立惟南面開罅梯罅得躋頗似太

華三峰上分仙掌下懸尺峽透險遮虛此真青柯嫡冢  
他未見其比即桂朔柳融諸峰非不干雲直上然石質  
青幻片片芙蓉攢合竅受躡痕受扳无難升陟此則一  
壁萬仞雖曲循隙竅何啻蹈空自奮也獨秀蓮蓋二峰  
爲此峰門戶其內環壑深塹蔽虧日月重岡間之人無  
至者久之下會仙歷三梯三里至峽坳之上峽南一石  
倚崖起下有線罅穿其中僅容側身進其上或連或缺  
既而漸下南轉出罅飛石上下懸嵌危不可躋返出石

峽坳倚石側復有道上出石端危懸殊甚扳根引蔓僅  
躋其端透入石闕中即倚石西盡處與前崖夾成闕穿  
出闕南抵飛石南懸之上瞰前罅正在其下遂扳登倚  
石頂則一臺中懸四崖環峙上又連者如橋缺者可瞰  
如井下峽坳歷六梯一里西出峽又一里北返寺

二十四日西向下山三里過周塘村倚山環池樹木森映  
南七里爲麻峒墟又二十五里宿中都峽

二十五日南二十里下核桃嶺大溪自南來西折去即

潯郡西繡江上流也發源自平山墟乃大容山西北水  
大容東西有兩繡江一南自廣東高州北至北流縣合  
大容東南水經容縣注於鬱此容縣繡江也一即此水  
爲潯上流之繡江循溪三里涉流渡江水及腹爲橫塘  
渡潯郡南界至此江南即鬱林地屬梧州西北境由江  
南岸溯流踰嶺南五里過白堤亦深山奧境溯溪右南  
行八里得大寨村自白堤至此山迴谷轉夾塢成塘溪  
木連雲堤篁擁翠宛然避秦處也

二十六日西南十五里過箬帽山山稍開南見大容又  
五里為平山村東望大容在三十里外猶有層峰間之  
南十里轉峽西出為勒菜口於是山分兩界大容東北  
峙寒山雄倚西南排闥東南去中成大塢溪流南注為  
羅望江源十里過馮羅廟廟南峽愈開寒山南盡而大  
容東轉於是平疇擴望南有岐東涉羅望江循大容南  
麓過陸馬廟東四十里可出北流縣予取鬱林道南十  
里止松城墟

二十七日十里抵鬱林州州西南一里南流江自東而西其流較羅望為大涯下泊舟鱗次上有堤內環為塘堤下卧石片片橫列涯間紫泉在堤下石片中石南北夾成門罅橫三尺濶二尺東橫環而西缺其南水從底上隘瀦其中停泓者三尺上從南缺處流瀉去時見珠泡浮出水面泉之西有石梁曰南橋跨南流江橋北文昌閣當江流環轉中虛敞可眺為此中勝覽橋南為廉州大道予由岐溯江岸東行水月岩道也東北共二十

三里踰山峽東下峽東石峰森森自北而南出峽循西  
土山東麓而北一村倚山東向又北一里半東轉得龍  
塘村村踞岡脊中其南水南流東去其北水北入水月  
洞由其東又北一里半直東抵石山中峰渡石橋而北  
則上岩西向穹覆山半上岩者水月洞南倚山憑虛之  
竅也石出自東北來南引而下一支中出者西瞰平蕪  
削崖懸竇層結皆不甚深而此層最下亦極擴環峰石  
皆青潤獨裂岩處色變赭赤石質尤窮極神詭尋丈之



間穴穿蓋堰无不具足岩前架廬當門敞其上不使拚  
岩勝由岩右腋穿竅上復出一層如偏閣其左腋可環  
柱出柱側懸崖上躋轉出岩末復得岩西向自分左右兩  
重左重在下垂柱裂竅仰睇上即右重也然歷磴无階  
由外北躋始入右重閣綴絕壁與左層翼對增妍皆岩  
之中層也其上削崖絕頂尚虛懸一重級絕扳躋惟供  
矯首耳水月洞在上岩北地稍下龍塘水經石橋北過  
上岩乃東向搗入水月洞洞門亦西向路由其南水行

路北相沿入水北透後洞出前後洞門一望通明水旁  
蹲石夾流兀突俱作獅象形洞頂垂石夭矯交龍舞螭  
繽紛不一其水平流洞中无真仙岩之大兩崖亦失其  
深峭可褰裳涉溪崖右有一小水南自支洞出爲陰洞  
左則沿溪笋乳迴洞迴夾上亦裂門綴穴層閣之上又  
匯水一池爲奇此明洞以內勝也後門崖口列大柱數  
條自門頂合并倒懸洞內望之蜿蜒浮動此明洞以外  
勝也陰洞乃明洞旁穴中又分水陸流不甚大東南自

牛隴又開一門穿山腹至此合明洞溯流南入半里洞漸沈黑崖益斗水益深結筏積炬屈曲約二里出牛隴此陰洞水中勝也從陰洞溯流始崖左嵌石下竇甚隘匍匐下穿引炬而前忽巋然上穹上下垂聳盤柱詭狀百出升降其中洞心駭目邃曲莫盡此陰洞陸中勝也是日予抵上岩已過午道流方扃戶出予坐崖下荔陰間久之道流罷釣歸即促其束炬爲水月游既入明洞篝火入陰洞道人不隨支流入由其側伏窪穿隙遍收

陰洞陸崖勝中崇宏幽奧森羅衆詭凡五易炬出欲溯  
流窮水崖道人以无筏辭請別由牛隴探其後崖不必  
從中出也乃出明洞涉水窮左崖之深仰睇後洞諸垂  
虬舞龍石出飯上岩宿

二十八日曳杖窮最上岩下憩右竅偏閣中既午循山  
而南至昨所度石橋橋側東折入峽中是山石峰三丈  
俱鋒稜巉削由東北走西南中支爲水月岩所托是峽  
則中支南支相夾者南支多峭崖裂竅予來時循其西

麓詢之士人皆曰中不甚深今故從峽中轉其北得平  
窪一團羣牛散寄其中知爲牛隴窮隴西北水匯成潭  
陰洞後門即東南臨潭上四旁皆陡石无路入必涉潭  
乃登洞甚虛敞隨水西入漸北轉石崖成峽水亦漸深  
昧與水月陰洞所見等雖未出其中兩端源流悉見可  
無煩暗中摸索也洞門右崖馬蹄痕莫紀其數疑即志  
所載天馬洞出洞益遵峽而北東西兩界峰石翔聳蔚  
然霞綺二支北盡處北支又突兀起與中支北麓對峙

成峽下有二洞南向蒸雲流電閃爍陸離東畔二門  
駢列雖懸乳繽紛俱不遽進西畔一門孤懸峰半洞門  
嵌空中忽淵墜深且數十丈宛轉內透極杳渺之勢但  
兩崖直削無級下降踞崖未望之飛鼠千百成羣見人蓬  
蓬內竄聲傳遙谷出洞望中支西北山嘴頗近以爲由  
此穿水月後洞抵上岩甚便趨一里至其下扳陟山崗  
則巨石飛聳中都蔓絡脚嵌沈淵底遙探洞外諸奇石  
杳不可見即溪流破壑出者亦盡沒其跡仍出峽返上

岩復至水月後洞睇望所陟路斷處尚隔一峰嘴也

二十九日由上岩過牛隴共三里出峽有兩歧直北循北支石峰東麓者爲北流大道東向踰嶺者爲間道乃從東歧二里抵塘岸墟墟爲陸川北境北轉即北流屬二十里爲橫卧村村北石山一支自北而南叢簇尖翠初望之以爲勾漏在是漸近路出其東南西望而行秀色飛映蓋此山在北流西十里勾漏尚在北流東十五里也自橫林共東北十里抵北流縣縣當大容南面之

中山脈由大容南下曰綠藍山水分東西流東流者為北溪循城東下登龍橋入繡江西流者即南流江源西南合水月洞水經鬱林南門西合羅望定川諸水南下廉州入海是縣實為南流源其曰北流者以繡江東自粵東高州來至此始勝巨舟東過容縣界合洛桑渡水經容邑南門下藤縣北入鬱江去非謂北流源此也縣西十里為鬼門關東十里為勾漏山二石山分支聳秀東西對列而鬼門顛崖邃谷兩峰合立路經其中勝與



勾漏實相伯仲予自橫林北望即竒之不知為鬼門也  
至縣始悟已從東南越之過以不及經其下為恨出縣  
東門北出隘門抵北山下循南麓東行五里度溪橋入  
石山峽中南為望夫石即黃婆岩西垂之山也北則石峰  
逶迤愈東石骨益瘦疑即獨秀岩所托今已失其迹峰  
東崖大書勾漏岩三字此東北二石峰俱東拱寶圭洞予  
東行峽中五里石山迴合中復突一峰勾漏菴正倚峰  
南麓其西隅即寶圭洞蓋庵頗整潔內堂三楹西則葛

令也葛像綸巾朱履飄然欲生前庭佛桑盛放乃令人  
多覓竹束炬爲明晨游具道人欣然願前驅

八月初一日先作寶圭行約道人肩炬篝火後至洞在  
菴北半里菴後先有兩岩一南向一西向望之俱淺寶  
圭更在其北漫流自西北東向直漱山足北陟之登山  
抵洞門門西向左開岩軒敞平臨西峰右則深入窪嵌  
下一石柱當門端石斜飛磴道由其側下至洞底交關  
爲四歧由東入由南入者二歧俱深黑歧而虛明則一

西向豁一北透焉西向豁者即正門所由入內與東岐  
黑穴對北透者乃偏門另啓正對南岐黑穴岐交於中  
成十字東岐之南頂側忽倒垂一葉平度半空外與當  
門柱適對上下憑虛各數十丈卷舒懸綴薄齊蟬翼葉  
間復分開竅竇若眼之決皆由東岐南崖扳級上抵葉  
根垂蒂處盤旋蒂側出葉間踞孔坐其上久之復盤蒂  
下向北透岐岐中一乳倒垂長數丈水由其端涓涓下  
更北入峽中右則窪而北出爲下門左復稍高北度疊

成上閣閣前平臨西北亦有乳柱界其中此明洞西北  
二歧也道人負炬至爇火先入南室兩旁壁峽起高而  
不廣入半里側皆裂竅垂柱少進忽下墜成淵由洞抵  
水深二丈水之深不知其幾也兩崖俱無可著足南眺  
其內宵黑莫竟促道人涉淵言水深曾無徒涉者促之  
覓筏則又云隘逼曾無以筏進者然則若何可入曰冬  
月水涸始可墜崖涉入何如曰內甚深能見明而不能  
見升也予聞之甚悵捫石投水中淵淵不遽及底旁燭

之仰見左壁有旁通隙入則漸東無餘竅乃下返出四  
達處更入東穴初兩旁亦成峽壁下漸高中闢如堂皇  
稍北而東徑遂窮比之南竅雖有穴宛轉深不及其半  
乃謀爲白沙洞游道人復肩炬束火從北透偏門下層  
出循山西北麓行始見其山前後兩峰駢立而中連峰  
西南突者即寶圭東北峙者乃白沙所伏白沙亦前後  
開洞前洞北向高敞分爲三門兩旁峻懸中可俯級入  
後洞南向高隘僅通一線前對寶圭背東即二峰中連

脊也先經白沙後洞草沒無徑道人不之入北去一里  
東北轉遶山北麓南躋前洞入門即窪下數十級及底  
仰視門左右各有隙高懸即所謂左右門也逆光流影  
豐照四徹然虛嵌莫得扳其處從洞中東轉頗崇宏漸  
窮漸黑予先遍探四面無深入路出促炬命導仍入其  
中以火四面燭旁無路也導者忽從南壁下投炬蛇伏  
入竇高不踰尺廣如之既入忽廓然盤空衆象羅列方  
瞻接不暇而崇宏四際復旁無餘隙透東轉南倏開倏

合凡經四竇皆隘若束管薄僅透屏故極隘忘窮屢經  
不厭其煩也既而東崖之上大書丹砂二字南有歧入  
之不深出向西轉再南則天光四射後洞門在望矣導  
者欲仍從前洞返予強之出後洞見寶圭後峰特爲當  
門屏乃西南披草棘出坳仍過寶圭北偏門將及菴東  
探清泉岩即前所經南向岩也還飯菴中下午探近山  
諸勝西南入黃婆岩黃婆岩者寶圭西南諸峰所裂岩  
也其山西自望夫石東來岩當其東北隅與寶圭東西對

稍南遜岩門外極危聳黃崖綴其中岩頂峰石分歧發  
異惜內无深入竅西抵望夫山西麓環觀東西南三面  
鼎立諸峰巒岫無出黃婆一面者按其攢簇之勢疑即  
志所載巫山寨云已乃循黃婆東麓南抵東南隅石萼  
懸削片片飛雲綴空自外崖扳峭石上歷豎隙屢出層  
空達峰頂遂盡發其危嵌之態下山轉循南麓峭崖穹  
立石色雄赭乃東由營房橫過勾漏菴過峰東南角蓋  
寶圭所托之峰南面駢立而中連西立一峰即菴後清



泉岩所倚東立者與之比肩南向循峰東麓北行路左  
得一東向岩內頗深漸縮如牛角出洞又北清流一方  
淙淙自亂石中出上皆草石蒙茸莫辨其自來忽一少  
年至曰欲覓洞乎其上翳草中二洞相距數十丈可探  
入也予急扳棘踐刺覓之深蔓中洞門果穹然東向外  
爲蔓石擁蔽入洞即隕然下墜俯瞰之有溪自南而北  
貫其底崖勢峻立非扳緣可下四瞩其上南崖有墜而  
未盡者片石懸空若棧道架壁澗不盈咫而長竟墜處

直達西崖但中棧有二柱駢立若樹柵斷路外一柱已截去下存尺許可跨而過但其處益狹必以兩手握內柱外柱始得越臨深蹈險莫此爲甚過棧達西崖與洞門正陽溪相向明炬燭之崖之下深墜與外崖等上則垂列乳柱迴錯開闔疎楞窈窕深入猶徹外洞光乃出崖臨溪從深墜處投空下抵溪中仰視洞頂高穹延照內映側棧凌虛尤增縹緲溪水深不及膝南從崖脚湧出北墜崖去即由此東出爲亂石泉源也從南崖溯流

入穴極底垂覆水面距止尺遂衝沫過潁南入數丈望  
前有流光熠熠又南數丈洞復穹然高盤轉而東西橫  
貫上則東闢爲外門門高聳與前所入門等勢時從人  
亦至乃令其以炬更前西向溯流洞宇宏放流益深濶  
又數丈石砥中流登石內望洞闊如廣廈淵潭四際其  
下以杖測水不竟其底不知更幾轉得抵寶圭南穴前  
所望深墜處也返步隨流仍抵東闢外門下從人將垂  
首及膝腰橫炬匍匐北向低穴出予止之曰此門雖峻

與先所入者無異不若扳空躋危竟登此門爲便遂扳  
崖出洞口門亦東向與所入門比肩特蔽於巖石連蔓  
遂相顧不見洞外循左崖平出返眺門頂又上闢一重  
惜無躋級蓋北洞與室內羅此洞外綴層樓所異者此  
耳遂一以北洞上登法而下崖半石隙蔓影中彷彿并  
北洞見之迨極下仰眺仍茫然失所睹矣乃自東南山角  
共一里入勾漏菴

初二日錄詩寶圭者竟日

初三日飯勾漏即東北行由營房轉山之東南角過亂石透泉處徑草坡五里越坡一塘匯水環浸山谷度橋約二里堰塘愈大石峰至此東盡山北隙中露大容蜿蜒爲列屏又東十里水自西北大容來東南入繡江爲容鬱分界曰洛桑渡水頗急以藤橫跨西崖上繫船於藤渡者引藤就進謝絕篙楫又東二十五里爲景清新橋則大容東峰巍然北臨若負戾又五里入容縣出城南門門外繡江自西而東西南合渭龍江北出藤渭

龍源出天塘山北向石寨村始入繡江渡江南向十里宿古樓村

初四日西南循大道盤都嶠而過蓋都嶠北俱削崖懸亘無級可階必繞出其南始可北向以登共五里過石寨村又一里抵石嘴鋪鋪東南八里有黃土岩不及登東度一橋始從岐北向上山循池東上五里抵南山寺古稱靈景寺大岩倚東崖門西向外欄高垣中設蓮座雖云寺實岩也蓋都嶠北穹高頂南分兩腋如垂臂直

下下甃合成塢清塘一方當其中兩腋石崖皆重疊迴  
亘一岩前斷復開一岩層穴之巔復環層穴外列多門  
如絳帷紫幄紛披競綴靈景爲東腋首岩最高而大高  
三丈五尺深五丈橫濶十餘丈兩端稍低中穹如半月  
北有三岩皆西向差小三清則當分股甃合處岩之高  
深橫濶同靈景東有南向二室與西向岩易隅齊列其  
西有飛岩則南轉東向爲西腋戶迤邐南下與靈景分門  
對峙若兩廡此下層也三清上又列重門爲中層無緣

陟道其上又啓一岩為上層是名寶蓋岩高十五尺深  
二丈濶五六丈後倚峰頂地愈高上獨當中幹平臨兩  
腋巔再上即中盤頂上午先抵靈景門外竹光旁映岩  
中霞幄高張心樂其幽曠僧留午餐聞三清觀道者他  
出竟止寺中

初五日由岩右北行歷西向三岩盤磴上入南向二岩  
共里半然後抵三清岩岩孤境寂樹拂空明又西歷東  
向虛岩仍返西向三岩間取道北上又里半沿躡崖末



抵寶蓋岩下視中岩嵌入足底而下岩三清樹杪若  
浮空載之者岩左循崖躋石石迴亘如盤髻上突俱不  
中空雖峭削無容趾級而予石嵌崖一同白石絕頂可  
緣之上上一里遂凌頂乃知是山東西駢列惟三峰最  
高皆北聳南俯此其最西者也迴睇最東層疊更多但  
不及此峻絕耳北又橫突一峰為此峰北護即縣南望  
之趨者其北面峭削特甚西則旁插一峰頗尖銳為此  
峰附西北兩附間下開一門內環為峽乃北護山與西

高峰夾而成者峽中又突嶂中盤爲當門屏由屏東進  
峽南轉則東西兩高峰交夾隙也迴谷甚深曲乃從舊  
道下至靈景岩飯石嘴鋪北過石寨村東望峽門窈窕  
聞其內山半有竹簡岩遂東向峽門入一里抵當門屏  
下其南面裂垂罅削爲三崖西則下屬北護峰與之並  
起東面危崖獨展與西高峰麓相對成峽峽南堰水爲  
塘環匯南罅三崖下西踰小峰即椎立於南塘上一家  
結茅居之環戶以竹致甚幽由北渡峽東上西峰北麓

一里越嶺少下下又成峽細流南向直墜椎立小峰腋  
溯流北入澗壁萋森藤竹映其上菖蒲覆石嵌水根葉  
交加足之所扳知菖蒲不知爲石也緣澗上東南陟嶺  
共一里飛石二丈當道懸梯入則竹簡岩在其北兩岩  
並列門俱西北向軒然高爽南有飛泉外墜岩下崖直  
達澗底計岩後即西高峰絕頂當與三清岩胸背值若  
由此置磴可先登峰頂次第下諸岩也返至環塘西探  
南面裂罅罅兩相距五尺兩罅並起界崖爲三俱危懸

絕峭仍東抵危崖獨展處循崖北行夾澗藤樹密貫深  
綠空濛徑西飛崖千尺矗影撐空隔絕天地若不有此  
行止謂都嶠南北峭秀可一覽罄幾失此幽邃凡二里  
危崖北窮與塢西轉即當門屏北麓也較南麓三裂崖  
稍遜其峻亦環亘成城路乃捨塢東向復登嶺嶺乃西  
高東北支北走屬北護峰者踰嶺復開南北塢塢東乃  
中高盤亘上亦有岩懸綴下與西高夾爲此塢北更有  
重崖間之南則灣環以出不知所極既而南見兩三家

倚西峰北麓居則石背村也時日已下逼抵縣尚二十里亟返出石寨村北過古樓村昏黑中抵繡江南涯叩昨來炊飯家宿焉

初六日出容縣北門即西行已復北轉循大容東麓十里水自西北來東入繡江三渡溪循溪溯流行夾谷間五里爲石頭鋪復亂流涉水山勢愈夾西折入三峽行透峽共五里山復開爲李村渡一橋更入幽阻盤折山峽間藤箐沈翳壑底溪流汨汨舉目不見天日五里躋

嶺復盤折其上峽又五里山迴谷轉瀦水滿腹浸山下  
皆平隘不流左右滉漾真山棲佳勝處南出峽水遂西  
流爲水源蓋大容北下脈所盤夾而成者西北二里至  
同山墟山乃大開西轉仍見大容西峰穎出又五里止  
雞黍山北塢秦窑村地多大竹裂竹片大至尺許

初七日西北七里踰長嶺始北望白石山在重峰外又  
八里爲平墟西羅江自南東北注源出大容西北至此  
始勝舟東兩日程出頭家寨下繡江云又十五里抵羅

秀北三里將至盧塘道旁空樹一圓出地一尺五寸圍  
大五尺中貯水一泓水面上不盈圍者五六寸下浮出  
平地幾及尺澄碧流瑩杖抵之深不可測珠泡沸沸上  
發屢斟出之輒齊舊痕不與地平尤爲可異又二十里  
渡大水河抵陳村

初八日西北八里上一嶺正西瞻獨秀下山二里爲陳  
冲已出獨秀東北正予昔登白石頂東望深塢中聚落  
也又三十五里至陳方墟宿

初九日西十里渡鬱江返潯郡寓中兩病人比柳州時  
少有起色橫州船以明晨早發遂攜囊下舟候

初十日未明發舟曉霞映紅從篷底窺之如行紫綵步  
障中三十里望白石山稜稜峙東南甚迫西北三十里  
泊鎮門

十一日二十里為白沙又五里登涯向羅叢岩東北里  
許北望數峰叢平疇中南一小峰如立指中三四峰東  
西駢立再北一石峰稍低而橫亘即羅叢所倚也由小



徑四里透小石峰峽又三里北抵羅叢岩門南向索炬  
同導者入洞頂高處盤窩成蓋又倒石捲空上垂但無  
登處北入五六丈遂分東西內外洞西外洞亦南向擴然  
透明五六丈由西竇北入則西內洞矣其內時夾時開時  
高盤時垂下覆頂平若幙裂隙成紋至石形之異有疊  
蓮綴空挺笋特立者隨處布置不專以乳柱見奇也計  
里許北過一隘西轉有峽北透天光時數炬更盡不復  
能由內返北躋後洞出穴北向僅可匍匐出洞已下北

麓循麓東行過東北麓導者指其上列竇曰此東洞後  
穴也予即欲從之入導者曰無炬須仍由前洞攜炬出  
從之環其東麓麓東一峰高踰此山竅穴離披導者謂  
都無深入竇然其北有石一枝離立起不由此不得覩  
也復入東前洞縛炬南游乳石奇變與西內洞等而深  
止得半不若西屢轉愈擴也東崖上穴駢迸亟躋上則  
有門三穴聯翩北向而下無階級導者謂從其內西向  
躋暗夾中有道可出然愈上愈隘不若仍出前洞也飯

後導者復肩炬爲水洞龍洞游水洞在山西南隅門亦南向中寬數畝潭水四際深不測其外淺處紫碧浮映日光所爍也洞左右俱有重崖迴環潭上可循行以入各抵崖北兩路旁絕上無歧穴不識水洞何所止出洞循西麓北轉東得龍洞洞在山西北西後洞西門亦北向中有水夾其上片石東西交成天生橋五丈以內又度一梁篝火入西穿石柱夾漸大南入可半里路窮下黑乃多燃炬照耀之亦有深潭一泓瀦水莫測其大更

逾水洞投石沈沈亦止而不流也已而熄炬消焰南望  
隔潭深處杳杳光浮水面導者神以爲光怪使然予謂  
穴影旁達導者曰昔村人結筏窮之至其處輒不得穴  
安所得倒影予曰此地深伏雖去洞頂甚遙然由門南  
出計去水洞不遠或水洞之光由水中深映浮筏者但  
從上矚不及晤光從水出耳若繫靈怪豈有自古不一  
息者哉乃復明炬出洞別導者西南十里抵安祿營爲  
潯貴兩道蓋羅叢岩西北有崇山橫亘其東北自潯之

西山直西南接貴縣北山二山兩角高張東西相距幾  
百四十里中間峯巒橫疊翠環雲繞頗似大容大容爲鬱  
江南條山界繡鬱兩江間此山爲鬱江北條山亦界黔  
鬱兩江間貴縣之倚北山猶鬱林之於大容兩嶺潯州  
之倚西山猶容縣之於大容東峰皆西突聳兩角中則連  
亘焉第大容東西八十里較近中有北流縣界其間茲  
山較遠而別無縣治惟安祿營爲中界耳

十二日自安祿西南二十六里直抵石山下爲平碣營

營東石峰峭立曰大岩山岩甚巨中容數千人南又突一小山上有平架石若橫橋其下透明出小山西爲馬鞍山亦峭聳起皆平碣近峰也南望銳峰若筆架若卓椎者在數里外望之趨三里度石橋又南十二里直抵衆遙峰西麓曰劈竹鋪眺路左諸峰分歧競爽即貴縣東山也又西南十八里抵貴縣南門則大江在下靜聞與顧僕所附舟先泊南門久下船迫暮放舟乘月西行十五里而泊

十三日行十里西抵西山南東南轉十里爲宋村由貴縣南至南山十里南山至宋村亦十里舟行屈曲水路倍之予先擬一至貴縣即住宿南山詰明從南山間道候舟詢之舟人既不得地名且云舟將連夜發遂不得行及發不過十餘里即泊今上午過宋村悔不從初所擬至此登舟也又四十五里夾江兩山起溯之入又乘月十五里泊香江驛

十四日過烏司堡已十里爲橫州界

十五日掛帆三十五里抵橫州南門猶上午也是日爲  
中秋節以行李及兩病人入南寧舟予獨入城傍江而  
東三里抵下渡渡南岸爲寶華山道道甚大共十里過  
蒙氏山庄又一里東向入山二里抵山下披叢入之寺  
尚在山半渡澗拾級又半里得寶華寺門西向寺旁無他  
勝問所謂山後瀑布僧謂墜自後嶺高百丈峽爲叢木  
所翳行絕蹊徑望之無所睹惟從嶺而上可聞其聲耳  
予乃曳杖上嶺自巔至峽皆紛植蔽虧予直山頂風瀑



怒聲不止瀑果不可見嶺南下五十里即靈山縣矣乃返寺宿

十六日自寶華山下十里望東北鳳凰諸石峰在三十里外路遠不及往遂西抵州由上渡渡江入南寧舟十七日舟西南行四十里抵陳步江內通小舟欽州鹽俱從此出是日靜聞病轉劇

十八日舟至是多西北行旁皆土山繚繞蓋自入鬱江惟鳳凰山石崖駢立瞰江餘皆土阜耳又三十五里泊

江西岸

十九日平明行五里過火烟驛爲永淳縣界於是舟北轉歷十二磯磯在江右涯盤石橫突江畔又四十里抵永淳南門

二十日北繞永淳東旋西繞其北江幾環城四隅矣於是始西北行共四十里過伶俐水五里泊

二十一日西南五十里八尺江自西來入江發源自欽州通舟可抵上思州遂西泊黃花驛驛去南寧府尚五

十里

以下八月二十二日至九月二十日凡游南寧者皆  
脫去



徐霞客遊記卷三下